

摘藻堂四庫全書薈要

集部

欽定四庫全書薈要

集部

秋澗集卷

六十九至
七十一



臣董誥詳校
詳校官助教臣謝登雋

欽定四庫全書薈要卷一萬六千二百二十五

集部

秋澗集卷六十九

元 王惲 撰

疏

衛輝路創修文廟疏


竊以廟而通祀國家極典禮之尊教以多方庠序乃風化之本子焉而父臣焉而君大凡日用之間無匪聖人之道既富而教以時則宜猗嗟君子之邦久曠素王之位吏之不職孰此重焉學之不講是我憂也爰興丕構

庸示教基牆前日輪奐之規敝百代神明之觀經始雖
先於一府贊襄寔賴於諸公蓋土木之資瓦甃之用須
豪傑而共濟庶程度之可完仰止翬飛永鏘玉振春秋
二祀肅豆邇三代之儀衮冕而王還文物昔年之舊凡
我同盟之者即當聞斯行之謹疏

大成殿上梁疏

伏以起百年之廢不渝乎素心合四境之人用扶其修
棟凡曰有生之者孰非吾道之中功將底以落成衆能

無於小助况鄉校半讀書之子而師帥舉稽古之流重
瞻邛衛之文久被絃歌之化推求治本一出儒宗敢紆
長者之車來聽兒郎之偉謹疏

重修衛州蒼谷山廣施王廟疏

伏以民所欲而神必從宜深乎報神有享而民乃主否
則疇依顧維明神爰處蒼谷司分兩部權控龍威時惟
嘆乾禱輒靈應且王號已昭於舊典而秩恩又見於新
條比者祠宇年深榱楹日圯塵昏畫像慘雷轟電掣之

雄瓦落宮牆動本老雲荒之嘆今將上完霧棟旁奕蒼池及時瞻山雨之來闔郡享豐年之賜神報久已豐矣公等宜何如哉謹疏

隰州蒲縣重建嶽廟臺門疏

伏以鐵鳳翔雲固神棲極於壯觀銀臺墮墜必天廢假於人謀眷岱嶽之行宮據蒲城之古麓豐碑具述歷代增崇雖作鎮於東方寔普臨於率土有禱輒應顯化殊常蓋幽明不測之秘神而生死揔歸之魏府茲非尊奉

曷致敬恭今將大復神譙俾還舊觀計百廢以定博顧
一已而難為衆力經營厥功可偁舉蒙少助不日告成
靈威肅喬木之風雲氣動孤山之色璇題藻棟儼九天
來格之儀僚寮黎民獲三殿護持之福幸垂藻鑒請署
芳題

玉清觀化緣疏

竊以雲飛鶴舉固所去以為常火食屋居在有生其可
闕未遂山林之往所期性命之安如某者忝鄭圃之居

久滿戶間之屨慕子真之隱擬耕谷口之雲雖南鄰北
里揔是檀那而凌雨震風可疎寢處為歸翼數飛於夢
蝶奈拙謀復甚於林鳩王錄事倘助於草堂庾桑楚庶
休於畏壘田園成趣平分乎二頃煙霞杖履他時共樂
此一庵風月凡曰通方之士能無尚義之心

鄆城縣普濟寺化緣疏

伏以建升道場不獨為天女散花之供祈聖人壽庶或
盡臣子永命之心眷高魚之北鄉迺獲麟之西鄙古瞻

勝槩地發龍光已霑普濟於明經未覩華嚴之寶界今
將百堵具舉精藍聿修需仗衆緣能成妙果道昭者雲
龕野衲托鉢者海嶠行滕卓錫得衆了此這場諸佛事
投竿在水肯教空載月明歸謹疏

請黃先生德新主善疏

三年至穀諸生恐廢於光陰一卷立師學行首明其模
範惟大冶有鑄金之妙良工收琢玉之功况漢庭發策
本之明經而近代程文自有定體欲造科場之捷徑須

求事業之專門伏惟殿元先生藻發儒林道傳絕派繼踵于黃氏三山之後探賾乎上古八索之前而又馳騁乎百家通貫乎一藝春圍陣合筆驚風雨之聲夢澤曾吞文麗江山之秀久矣倦游之興偉哉樂育之心倘蒙憫小子之斐狂永以為國人之矜式高懸絳帳嗣音敢自於吾儕仰屬青衿固讓毋勞於謙德謹疏

襄陵縣重建飛橋化緣疏

伏以平水澮川依約金城之舊彩虹沉影空餘華表之

遺矧當晉秦南北之衝有秋夏泛溢之阻僧清者心存
肯綮力振前修經營者已數年奔走者幾千里每以力
微而事大懼夫始作而終衰驅石必東海之鞭洪波可
駕街木仰西山之鳥尺喙徒勞在他邦果於義為豈鄉
國獨無至意倘垂一諾過重千金少分有限之功陰受
無量之福公私安濟免勞鄭國之乘輿遐邇具瞻復覩
河東之舊觀謹疏

追薦孤魂化緣疏

切以辭辯游魂雖著長終之變傳明滯魄深詳為厲之
文久失所依誠為可憫痛彼河南之戰重為天下之傷
血殷溱水之波尸蔽奉寧之野兵自休者已三紀祀而
存者能幾家野祭不來愁絕喪元之勇士沙塲半歿盡
為亡社之餘黎蕭條蒿里之悲風黯慘棘林之老月尚
過者動藁裡之嘆況仁人同桑梓之情為所當為祭而
非詔凡吾見而知者恐不聞斯行諸故謁同盟畢茲大
事魂兮來此庶幾貴賤之攸歸心獲所安不謂幽明之

有識倘蒙金諾請掛銀鈎

上張宣慰疏

為劉進之作

切以辱甲子於泥塗趙武有由吾之嘆轉江沱之窮鮒
昌黎云投足之勞懷古傷今而復有此進之先生文摩
屈壘心醉麟經學詩得東野之窮好學有征南之癖以
壯歲負并汾之氣幾年為河朔之遊老雖益堅空至於
屢拭白首窮途之淚夢黃雲畫角之秋思歸敝廬得甘
飴粥撫孤松而吊影望先隴以含悲具爾是逢翻然可

駕麥船惠顧一帆助順濟之風華表歸來獨鶴遂長鳴
之願伏惟使相學士閣下氣嚴霜簡名在帝心炳趙衰
爰日之輝聳吏部泰山之望爰從公議兩鎮名藩承流
已浹於河汾宣化又漸於海表去國見似之者喜同聲
函相應之情嗚呼託子而來嘗切慕古人之義請書而
去思游揚足下之名為代悲鳴爰成尺素幸念鄉枌之
舊與分鄰燭之光倘鑒私衷請題芳字謹疏

為宋儒楊從龍贖身醵金疏

切以觀軍府而釋鍾儀傳美晉侯之德解左驂而贖石
父世稱晏子之仁古則云然今亦能爾唐風雖儉舉義
則豐荆璞未逢遇和則售士人楊從龍者晉州羈客吳
會諸生念江湖當波蕩之餘得升斗遂安身之計在士
庶官寮之闕當體寬恩以吹噓惠費之仁不過一讌倘
蒙金諾請署芳題

美學士善疏

眷言六藝數居衆技之先訓彼羣蒙業必專門之老伏

惟宜之先生術窺海鏡心洞神機以勾股而測高深極
乘除而推盈縮挾此九章之妙屢為一卷之師倘許光
臨豈辭擁篲口傳要訣同趣開悟之方手筭萬籌庶無
倒顛之患謹疏

為刊字釀金疏

闕 發明闕德豈鄉國之獨賢關繫民風庶見闕

闕 事為闕者凡一十五卷計字數近六七萬言闕

廣其傳必錄諸梓惟是閑居之久苦無力量之多凡工

費口糧倘蒙少助雖夜光明月不為暗投公等自優為之我正賴有此耳謹疏

太康縣新建忠武史公祠堂疏

伏以臨危脫難無深骨肉之恩報德靡忘莫重春秋之祀惟太尉忠武公曩分帥閩東徇京畿擴仁心而斂兵鋒招拓城而降陽夏繼來臨戎尤盡撫綏雜耕無相擾之虞按堵享維新之樂百年父老廕自餘休三尺兒童慶延史氏今將啓神祠於舊里昭大德於此邦某等雖

經始於一時敢獨專其至美庶憑衆力易見成功具我
時瞻要擬甘棠之木眷言遺愛豈惟墮淚之碑凡我同
盟請題芳字

秋澗集卷六十九

欽定四庫全書薈要卷一萬六千二百二十六

集部

秋澗集卷七十

元 王惲 撰

疏

衛輝路總管府重修帥正堂疏

伏以聽共民事必先處所之安絡繹星軺無匪王人之
重顧衛輝之公署寔民庶之具瞻起蓋年深疏陋日甚
飭傳舍固為微末論摠治此則本根今將重構一新增
光六縣俸稍先輸其兩月餘力須藉於衆官勢惟秉其

一時工可就於不日清香畫戟雖云都尹之居聖節公
筵永祝皇家之壽敢祈同志各署芳銜

樂籍殷氏醵金疏

量珠買笑空憶當時糊口為生重過故里李弄玉幾年
西邁杜秋娘未老東歸載瞻光祿池臺總是舊遊桃李
樂籍殷氏者名香佳麗天賦芳溫曾將兩字風流占斷
八州煙月此日紛華都識破向來心事欲誰論鳳凰臺
上有伴吹簫鼓笛場中何堪弄色與行丐歌姬之院且

少分隣燭之光萬水千山得得來一餅一鉢垂垂老桑
間游女固能憐暮雨之詩芳草王孫尚不棄春風之面
倘霑餘潤儘富歸裝多寡隨宜以疾為妙謹疏

李府君建碑醵金疏

故汲縣長官李公天祥素負義襟號稱能吏急難多國
士之風宰邑有桐鄉之愛去世能幾日有家為一空短
碑卧草未覩瑤鐫孤壠含悽豈勝冥感凡曰相知之舊
能無墮淚之傷庶少分魯肅之困共建此陽城之碣睠

言故闕永賁幽光

請靳顯卿山陽闡庠疏

切以嬰孩教子責在父兄詩禮傳家必資師範伏惟顯卿學師性資純厚賦業優長規模有乃岳之風句讀得故家之習久訓蒙於柘里今閑處於山陽煩於白社之間載闡青衿之教邑雖十室使盡為忠信之人喜動七賢不負此風煙之勝恭惟短疏具列同盟

重修泰山廟疏

伏以物有生死維岳主司事至式微須人興葺睠新中
之左地儼泰岳之行宮當年廟貌壯麗有餘此日巖廊
推毀無幾賴陳將軍之果毅曹鄉老之經營一備餼糧
一鳩工役周垣已興於百堵正殿將復其五楹度其工
之寔繁計所費而不少若憑衆力可見成功喜車馬風
雲使降臨之有所官僚戶庶獲福賜於無窮謹疏

重修河內公廟化緣疏

惟公德並羣哲材優四科為邦致三善之稱折獄有片

言之譽顧瞻喬木懷想其人況此蒲鄉寔維舊治民淳
訟簡猶沐休風世遠祠存不忘久敬然塵昏像設殆緼
袍敝故之餘草滿露壇起燕麥動搖之嘆惟夫興茸可
表尊崇凡我同盟義當少助謹疏

省齋裴先生建碑疏

伏以辭焉不愧緣景行之獨高得之無財於人心而能
校故武昌節度同知省齋先生兩朝名士一世龍門在
鴻文大學之間有瑞錦秋濤之譽里雖稱其通德墓未

表乎豐碑眼中縫掖半門生身後殘膏丐來者知歸報
本復有望於諸君礪石劖銘庶落成於不日嶷嶷麒麟
之碣輝輝星漢之光匪惟裴氏之獲安誠亦士林之美
事

為耶律伯明醵金疏

伏以分財曰惠莫先賙急之心見義當為切戒後時之
嘆伯明秀造漆水東丹之後右丞文獻之孫學則有餘
空至於屢為子娶婦禮尚未完急于謀生力有不及顧

同志多孤貉之列忍一家有風雪之寒少分半宴之資
可合二姓之好倘蒙薄助請署芳題

張漢臣醵金疏

張漢臣者監司故掾淇澳諸生緼袍傷此日之貧客舍
嘆故人之雨心闕桂玉連阻風波既久淹吏部之除未
免索長安之米况臺閣半為鄉舊而燕雲古有義風哀
王孫者世為尋常付裝資者日云不少舉軀望惠才固
非於建封指困不難時豈乏於子敬望升水而為恩於

目下奉千金而敢忘於他時固涸能濡多寡惟命

梁彥升釀金疏

太原人

山頽木壞永哀賢哲之萎高上坎中未遂窀穸之窆冀
彼齊卿之悅傷哉季路之貧前進士太原梁公子彥升
詩禮名家美牆純孝思雙親而不見抱孤影而自怜秋
草淒兮恨隔於九原春露濡而履茲者二紀惟得脫驟
而賻乃能大事之襄四十萬非敢望於郭代公五百斛
庶少分於范左相凡為同好寧不興哀淇水東傾渺逝

者如斯之嘆太行西望慰異鄉久客之心

大繼長醵金疏

國破家亡老作無依之客衣單糧絕誰堪卒歲之憂大
先生繼長者渤海名家中朝顯貴功名富貴竟無有文
彩風流今尚存黑貂盡季子之裘短布纔寧卿之氎雖
黃髮高年之列奈清霜九月之寒甘餓陪於西山東荆
薪而煮白石哀哀漂母進簞食於何難戀戀故人贈綈
袍而何有大凡同志能不興懷所願不過一金未免上

煩多士謹疏

南宮縣文廟三門化緣疏

切惟衣無袖領難以為全行舍戶庭將何自出南宮廟
學修建有年大殿既完兩序已具獨臺門而未稱在衆
意以未安須資多助之方可就三楹之勝雲煙動色歲
采泮水之芹雷霆乍驚玉振殷人之輅倘垂重諾請署
芳銜

滑州文廟化緣疏

天下之事無大小得人則興郡國之學由古今似緩而
急蓋庠序乃禮文之地而絃歌為風化之原繫爾侯邦
號稱文治載瞻清廟有乏宏規廊廡卑棲狹僅容拜宮
垣頽圯高不及肩我將易故而增卑衆欲妥靈而揭敬
輪奐動泮池之藻丹青一繪事之新審致大成需資多
助垂旒委佩復閭閻侃侃之儀趨事赴功得磊磊落落
之彥賢使君業為倡率同僚屬理當贊襄毋恪援毫重
書所諾謹疏

鉅鹿縣講堂化工疏

粵惟大陸寔曰古任創興釋菜之宮舊有明經之室年
深疎陋日就傾危今擬修崇務敦風化大弓長劍其備
可忘三綱五常匪學不立稍聽一丁之諭將成百室之
歌敢仗斯文共成勝事謹疏

為周府君立碑醵金疏

伏以起千年已廢詎能忘利益之恩顧喬木而言尚未
覩麒麟之碣故江淮都轉運周侯除興義重撫字恩深

公雖云亡德其可後今也有銘不愧墮淚無從惟斷石
而為特書可於公而見不朽庶圖少報永振休聲凡我
同盟共成盛事謹疏

汴梁路相國寺化工疏

汴梁路大相國寺住持僧柴某欽奉聖旨修葺前殿所
有化疏合行開具者伏以梵宮盤鬱無踰相國宏規傑
閣嶷存猶是李唐遺構浩劫黯浮雲之衛秋風動喬木
之悲顧二三之殘僧將修完而何力既蒙睿眷尚賴人謀

況有生趨向而孰非善心在稽首皈依者當體上意能
傾心而樂施或分困以捐金同新般若清光與復天人
偉觀風鈴如語響泛潮音天女散花有來衆士祝延聖
壽載繙貝葉之香翊贊皇圖永此彌廬之固謹疏

請陶教授主善疏

切以擇師教子孰無希驥之心傳道解疑須藉鑄金之
手況木非操則無自圓之理玉惟斲則就成器之名伏
惟主簿先生經明行修學博才瞻聞望素高於儒館淵

源遠自於顓軒議論造精一之微文辭知古今之變惟
是青衿之子常瞻絳幔之儀敢瀆師嚴再新函丈心專
志致深傳體用之方日就月將最切後先之序以茲誘
掖庶正斐狂所有束脩開呈於後

重修開泰寺大功德疏

伏以道不遠人善無先於利益物興有數勢須藉以英
豪迺眷燕山昔為遼府開泰禪寺者爰因鄴第建自樞
臣雖復兩朝之增葺何堪雙樹之蕭條如聲色香味布

施能圓則上下虛空何修不可伏惟叅政相公才優鞭
筭義重規為禪扣愚機派流臨濟遠暢神通妙力幾開
方便法門莊嚴已擴淨慈天庇廕證明羅漢夢況茲金
粟影歸爾古精藍雨花翳空得還舊觀登壇判斷重振
玄關盡刮衣盂已是多餘香積飯有來福德何嗟不到
佛如來載經載營同心同德永拱寶祚為國拈香

前進士李舜臣姪求子婦醵金疏

切以燕雲尚志情深友義之懷婚媾及時詩美桃夭之

詠前進士李公舜臣之姪元德為子求婚納徵有日奈
囊空而羞澁須力濟於英豪或采幣以相投或青鳬而
見賜迓續先人之肩配合二姓之歡如種玉而獲珪璋
在貧家而得箕帚豈曰小補寔荷鴻私兒女債還敢云
遂尚平之志簪纓顧恤庶幾接仲郢之風請署芳銜用
昭金諾謹疏

銅臺阿丑石氏疏

年方破瓜在故里樂籍者凡四年今嫁李氏相得甚

懽辛巳春於良家來見酒間叙話心事追念舊遊蓋
廿有二年矣且有滄州之行求余言為重因書此以
付

去國朞年見似者而輒喜改圖故步念此意之可嘉銅
臺石氏者穠艷呈霞髻雲綰綠白雪擅郢中之曲絳羅
捲薛氏之窻玉秀蘭芳風尖月細荏苒四年之塵土稱
量幾斛之珠琲悔失此身得逢佳配回金沙灘頭之夢
吹碧桃花上之笙簫自憐度日之難未免有當壚之役

試看長樂坊頭雪猶曰春風醉裏香將安排老歲生涯
預准備藥壚經卷已蒙重顧來謝鈞慈滿地流錢共說
平生鞭笞了投竿在水肯教空載月明歸謹疏

前泉州路總管推官朱淮故太師徽國文公嫡孫今
擬於饒州路擇湖山勝地創建書院中起文公祠堂
教誨子弟奉承香火上祝聖壽無疆次為宗族朋從
續考亭道脈之傳伏望公卿士大夫喜聞樂助庶資
衆力克遂初心者

伏以明經傳道深有賴於後人圖報起祠必資成於多
士況在魯玄之列當膺倡率之勤恭惟晦庵先生學貫
六經名高諸子始焉講學克紹程張之緒餘展也成功
直造孔顏之堂興發揮義理昭若日星沒未及於百年
道大行乎四海凡曰進修之者孰非霑溉之餘方國家
之右文宜天下之通祀廼眷餘杭名郡未瞻遺像清光
聿修香火之新祠爰擇湖山之勝地計所需而甚廣嘆
獨力以難勝少分涓滴之餘波同濟經營之盛事絃歌

不絕敢云家學之有傳俎豆斯陳應使宗風之罔墜倘
蒙金諾請署珍銜謹疏

牒

張氏秋香館酒牒

伏以三尺紫簫吹破金臺之月一竿青旆飄飄淇水之
春孝先張君系出豪華長居紈綺壯狃五陵之裘馬老
尋中聖之家風左顧東城名香新館雖借作育廉之地
已大蒐破敵之兵瀧春溜於連床貯秋香於百瓮與同

至樂任價寬沽罄翠罌銀勺之歡是非何有聽白雪陽
春之曲明月無邊信不比於尋常莫等閑而空過任使
高陽公子從他宮錦仙人爭貫金貂紛摩劍珮繫馬鳳
凰樓柱掛纓日月牕扉白骨蒼苔古人安在流光逝水
浮世堪驚況百年渾是者能幾迴一月開口者不數日
忍辜妙理也作獨醒莫思身後無窮且鬪尊前見在那
愁紅雨春闌綉幕之風來對黃花共落龍山之帽快傾
銀而注瓦任枕麴以藉糟只空工部之囊扶上山翁之

馬前歸後擁盡日而然

約

林評事花約

伏以良辰樂事雖曰難并旨酒嘉肴豈容獨饗茲者小
園竹木粗有堪觀故里賓僚可陳一宴恐教康節獨擅
花時敢擬右軍同修禊事伊誰有語花枝羞上老人頭
來日無多此樂莫教兒輩覺玉盤濯月已煩竹裏行厨
綉勒攢香暫簇花邊駿馬擇於今月二十八日就樊園

聊備芳樽伏望羣英早垂光降

茶約

伏以歡情漸減豈任林酌之娛老境相宜正有茶香之
供今策勲茗盃集勝爐薰須分旗葉搶芽選甚鷓鴣螺
甲破帟帳梅花之夢叅老夫鼻觀之禪要追陪七椀家
風共消遣一冬月日勿謂淡中無味且從靜裏著忙老
懷自嚮故人多此樂莫教兒輩覺我今首倡盟可同尋
湯響松風已減却十分酒病日拖竹杖長行攜兩袖香

烟顧此聞思咸歸歡樂謹約

禊約

四序節氣春極和而季月為之盛故古人因三日盛時而為元巳之節然鮮克與巳相會今歲茲辰適值癸巳又一盛也用是約二三知友讌集林氏花園所有事宜略具真率舊例各人備酒一壺花一握楮幣若干細柳圈一春服以色衣為上其餘所需盡約園主供具秉簡續詠辨追洧水歡遊禊飲賦詩修復蘭亭故事

上梁文

大成殿上梁文

寶位龍飛首闡大猷之化儒宮灰冷鞠為茂草之區恭
惟總管陳公爰自下車慨焉興感仰體右文之意推明
樂育之心因政平訟理之秋舉禮在寔亡之典大復素
王之宇重開太極之天予以增聖道之光華鑒晚生之
耳目矧惟治本一出化原猗歟岳牧之心擬變詩書之
俗落成有日神化無方折雄冠黻佩之徒趨庭受訓易

篆刻雕蟲之子執簡傳經奠兩楹之豆遵舞三代之韶
劑伸嚴祀典咸啓敬心猥承縫掖之流可後閔宮之頌
有來多士共駕虹梁兒郎偉

拋梁東萬古宗風一泮宮賴得賢侯扶聖教太行元氣
魯龜蒙

拋梁南奕奕新宮播盛談一旦詠歸欣有地北山伏掃
讀書龕

拋梁西聖學如天不可梯須信小成徒洒掃互鄉名與

大賢齊

拋梁北萬象經天瞻拱極
奎高射德星明昨夜騰光
滿營室

拋梁上偃植圓又屹
相向人從懸甕發丹書
堅與西山兩無恙

拋梁下適衛屢為瑗所舍
春風綠滿杏壇陰從此
西遊宜稅駕

伏願上梁之後邑多君子
世極文明國本固盤石之
安

天子享萬年之壽斯文有在振木鐸於中天遺法復行
得人材於鄉校舉霑寸進仰答明時

鎮國寺上梁文

伏以坤儀佐理已收純被之功象教加持妙極大千之
力爰擇鴻都之古輔聿興蓮宇之新宮我國家崇報是
圖慈憫為念演三乘而設教斂五福以錫民一朝之役
罔及於國人萬有之施悉供於內府於是郢斤運巧鄧
梓呈材有來神力之無方遂極天下之大壯桓楹修棟

鬱雲氣之上浮疊棋層檻屹丘山之壁立仍差穀旦共駕
虹梁用綴蕪辭式伸善禱兒郎偉

拋梁東六合天花散曉風隻履不煩惹嶺去九天開出
梵王宮

拋梁西萬劫塵緣妄想迷方寸欲明諸佛果正須一勺
自曹溪

拋梁南莫吃龍門萬佛龕會昌使樓櫓雙樹地萬方來此
發經函

拋梁北萬像森羅朝帝極我為禮此玉毫光聖德無量
千萬億

拋梁上寶氣瓏璵諸佛像我今建此內道場海會龍華
無盡藏

拋梁下千里王畿際兩稼年年鐘鼓樂清時共對神明
霑聖化

伏願上梁之後天低法界海沸潮音山河扶綉戶之光
日月擁雕簷之氣永將寶供仰贊皇圖奠金城不拔之

基祝天子無疆之壽

亳州太清宫上梁文

至道無名混太清之一氣真人首出廓衆妙之玄門載
歌道德之言寔翊邦家之化太上混元上德皇帝潛輝
柱史肇迹瀨陽千年丁令共仰神遊三尺兒童知尊聖
祖故歷代備褒崇之禮皇家極樓觀之雄雖九闕伏

於淵泉而紫氣日躔于天宇嗣興有數今見其人演化

宗師真人德紹蟠闕教流白雪遠乘鶴馭來住琳宮爰

即遺基重興丕構用篤皇家之祐先開紫極之宮及覩
成規有光徃制煙雲晻靄車回隱玉之鑒仙聖超騰日
仰猶龍之表恭依善頌用駕虹梁

兒郎偉拋梁東綿絡鈞天夢帝宮適喜頓然還舊觀玄
都仙客振孤風

兒郎偉拋梁西萬里黃流入望低為謝尋源張博望故
家仙李又成蹊

兒郎偉拋梁南聖牘玄珠閱不談且置金華丹寶說請

從河上發經函

兒郎偉拋梁北玉帛中天朝萬國玄風度會雪山陽柱
下有人談道德

兒郎偉拋梁上天蓋蒼蒼含萬象西昇不著五千言萬
古流沙空悵望

兒郎偉拋梁下祈福為民崇廣廈道家設教貴無為裘
葛暄涼自冬夏

伏願上梁之後人麻道廕世沐令風山河扶綉戶之光

日月擁雕梁之氣竹宮望祀休誇漢武之祈靈故宅徵符已表吾皇之萬壽

萬壽宮方丈上梁文

伏以起百年之構植大本於宗門葺一日之居見恒心於君子萬壽宮之丈室自昔中和之起廢逮今六祖之丕承物既弊而更新制有增而匪舊敞植楹而中起翼兩室以傍開雲霞藹疊拱之間燕雀賀華穰之上前瞻玉鏡通暢玄風後壯宸居擁陪法座況仙

馭來臨之有日令威歸語以無時功既落成衆孰
不樂倚疊如山之壯聲單肯構之誠重光動淇水
之波佳氣鬱太行之色式扶修棟可進謠詞兒郎
偉

拋梁東燈火春城動竹宮看取洞天閑日月佩環聲
在步虛中

拋梁西冉冉春雲去殿低莫道靈章仙秩峻青霄有
路似丹梯

拋梁南故院當年一畝菴
碧瓦朱甍今覆壓後人光
大儘無慚

拋梁北五福從來尊太一
碧霞千古振孤風奕奕神
光長拱極

拋梁上符籙潛珍無盡藏
光芹未暇詫青藜六代傳
芳主函丈

拋梁下玄教扶持衡可迓
德星所在風雨時萬里如
雲看多稼

伏願上梁之後教基大闡福地重新五雲來崑閬之仙
六甲秘風雷之奧華簪列拜再光傳度之儀金簡朝元
永肅焚修之供以茲快樂普洽生成

太一宮清蹕殿上梁文

伏以顧瞻琳宇已嚴上帝之居婉孌龍闕

闕

聖人之作

恭惟皇帝陛下圖回治道寤寐幽人爰從潛躍之初重
有中和之賏風雲允協文物闕

道而沃帝聰曾

一言而利天下師今不見意若無闕

大駕以來臨駐

故宮而懷舊漢文授經於河上何以加諸軒后訪道於
崆峒初不踰此以茲寵渥光極玄門念我後人思皇睿
眷故大起御天之構庶少伸就日之誠既獻歲以儔功
乃開樽而考室敢陳善頌用駕虹梁免郎偉

拋梁東夜鶴林驚蕙帳空一自翠華臨幸後至今闕
鎖春風

拋梁西尚記春旗簇仗齊真氣滿空驚戶牖光芒
到青黎

拋梁南論道當年有興談萬乘賁臨猶望隴非緣參訣
發經函

拋梁北金簡朝元瞻帝極千秋萬歲永無疆更願八荒
開壽域

拋梁上碧瓦朱甍導大壯五雲佳氣鬱蓬萊游像闕思
闕天仗

拋梁下華表人歸餘道價九天雨露有偏恩不遣靈章
隨物化

伏願上梁之後日月擁雕楹之慶山河扶綉戶之光道
貌以之增輝真仙為之改觀雲紅黼座濃薰花氣之香
風肅泰壇光動竹宮之祀斂茲廣福錫厥庶民會此明
時普同至樂

春露堂上梁文

伏以飛鳥知還固擇安棲之所弊廬託處舉懷必葺之
心秋澗老人樗櫟散材萍蓬遠宦東西南北兩紀奔馳
雨露風霜終年偃薄久矣壯年之倦浩然故里之歸延

構新堂不遺舊物豈獨廣居而移氣蓋將追遠以顯親
連薨接棟而中列三楹却暑回寒而旁開兩室俾春秋
寢祭衆免勃磈節叙賓筵喜同笑語惟是時思之切仍
題春露之名言舉斯心界之來者承承繼繼無遏佚前
人之光鬱鬱葱葱非祇謂喬木之美爰扶修棟例有歡
謠兒郎偉

拋梁東旭日紅駘蕩春陽滿太空人喜廟堂真宰出不
煩東觀論青蟲

拋梁西萬瓦齊撲地間闔似碧鷄春露堂中春自好何
嘗有意夢沙堤

拋梁南合朋簪友道微來不易談正有歲寒三益在風
簷先種兩株杉

拋梁北正統一東亘扶桑略西極一堂雖起有先憂所
願八荒開壽域

拋梁上天蕩蕩光動太行三萬丈主人投綬已歸來夜
鶴不須驚總帳

拋梁下觀治化叶氣薰然衡四返過門有客問行藏蓬
累而行得時駕

伏願上梁之後里多仁美門掩春華歲時豐穰問甚盤
中之宿物情和好爰及屋上之烏對床賡風雨之吟開
卷得聖賢之樂倘使少如所願不為虛度此生

秋澗集卷七十